

續修廬州府志卷四十六

花翎道銜江南安徽廬州府知府清泉黃 雲總修

武功傳一

地居四戰人多材武糾糾桓桓百夫之禦奮迹雲霄折衝師旅因事紀功臨文詳敘

漢

范增居鄴人素好奇計項梁聞陳王死召諸別將會薛計事增說項梁立楚後梁然其言乃求楚懷王孫心民間立以爲楚懷王項梁死懷王召宋義爲上將軍項羽爲次將范增爲末將羽悉引兵渡河破秦軍行略定秦地聞沛公已破咸陽大怒使當陽君等擊關羽遂入至

續修廬州府志

卷四十六

武功傳一

戲西沛公軍霸上未得與羽相見增說羽急擊勿失旦日沛公見項王至鴻門項王留沛公飲項王項伯東嚮坐亞父南嚮坐亞父者范增也沛公北嚮坐張良西嚮侍范增數目項王舉所佩玉玦以示之者三項王默然不應須臾沛公起如廁遂去令張良持白璧一雙獻項王玉斗一雙與亞父亞父受玉斗置之地拔劍撞而破之曰唉豎子不足與謀奪項王天下者必沛公也吾屬今爲之虜矣漢之二年項王數侵奪漢甬道漢王食乏恐請和割滎陽以西爲漢項王欲聽之增曰漢易與耳今釋弗取後必悔之項王乃與增急圍滎陽漢王用陳平計閒項王乃疑增與漢有私稍奪之權增大怒曰天

下事大定矣君王自爲之願賜骸骨歸卒伍行未至彭城疽發背死史記項羽本紀

陳衆廬江人爲揚州從事建武中李憲餘黨涇于臨等聚衆數千人屯灤山攻殺安風令揚州牧歐陽歙遣兵不能尅帝議欲討之衆白歙請得喻降臨於是乘單車駕白馬往說而降之灤山人共生爲立祠號白馬陳從事云康熙志

三國

周瑜字公瑾廬江舒人也從祖父景景子忠皆爲漢太尉父異洛陽令瑜長壯有姿貌初孫堅徙家於舒堅子策與瑜同年獨相友善瑜推道南大宅以舍策升堂拜

續修廬州府志

卷四十六

武功傳一

二

母有無通共策東渡瑜從攻橫江當利擊秣陵破笮融薛禮轉下湖孰江乘進入曲阿還鎮丹陽袁術欲以瑜爲將瑜觀術終無所成求爲居巢長假途東歸還吳是歲建安三年也瑜時年二十四吳中皆呼爲周郎以瑜恩信著於廬江出備牛渚後領春穀長頃之以爲中護軍領江夏太守從攻皖拔之時得喬公兩女皆國色也策自納大喬瑜納小喬五年策薨權統事瑜以中護軍與長史張昭共掌衆事十三年曹公入荊州劉琮舉衆降權延見羣下問以計策議者咸謂不如迎之瑜曰不然操雖託名漢相其實漢賊也將軍以神武雄才兼仗父兄之烈割據江東地方數千里兵精足用英雄樂業

尚當橫行天下爲漢家除殘去穢况操自送死而可迎之耶瑜請得精兵三萬人進住夏口保爲將軍破之時劉備爲曹公所破欲引南渡江諸葛亮詣權權遂遣瑜及程普等與備並力逆曹公於赤壁瑜部將黃蓋取蒙衝鬪艦數十艘實以薪草膏油灌其中裹以帷幕上建牙旗先書報曹公欺以欲降曹公軍士皆延頸觀望指言蓋降蓋放諸船同時發火時風盛猛悉延燒岸上營落煙炎漲天人馬燒溺死者甚衆軍遂敗權拜瑜偏將軍領南郡太守屯據江陵是時劉璋爲益州牧外有張魯寇侵瑜詣京見權乞取蜀並張魯與馬超結援還據襄陽以蹙操權許之瑜還江陵爲行裝道於巴邱病卒

時年三十六瑜兩男一女女配太子登男循尚公主拜騎都尉有瑜風早卒循弟允初拜興業都尉黃龍元年封都鄉侯瑜兄子峻亦以瑜元功爲偏將軍領吏士千人峻卒全琮表峻子護爲將

三國志吳列傳

陳

任忠字奉誠小名蠻奴汝陰人也多計略膂力過人尤善騎射州里少年皆附之梁鄱陽王蕭範爲合州刺史聞其名引置左右侯景之亂忠率鄉黨數百人隨晉熙太守梅伯龍討景將王貴顯於壽春每戰卻敵隨範世子嗣率衆入援會京城陷旋戍晉熙侯景平授蕩寇將軍王琳立蕭莊署忠爲巴陵太守琳敗還朝遷明毅將

軍安湘太守仍隨侯瑱進討巴湘累遷豫章太守太建
初隨章昭達討歐陽紇於廣州以功授直閣將軍遷武
毅將軍廬陵內史秩滿入爲右軍將軍五年衆軍北伐
將兵出西道擊走齊歷陽王高景安於大峴逐北至東
關仍克其東西二城進軍蘄譙並拔之徑襲合肥入其
郛進克霍州以功授員外散騎常侍封安復縣侯邑五
百戶尋詔忠都督壽陽新蔡霍州緣淮衆軍進號甯遠
將軍霍州刺史入爲左衛將軍十一年加北討前軍事
進號平北將軍率步騎趣秦郡十二年遷使持節散騎
常侍都督南豫州諸軍事平南將軍南豫州刺史增邑
並前一千五百戶仍率步騎趣歷陽周遣王延貴率衆

續修廬州府志

卷四十六

武功傳一

四

爲援忠大破之生擒延貴後主嗣位進號鎮南將軍入
爲領軍將軍加侍中改封梁信都郡公邑三千戶出爲
吳興內史加秩中二千石及隨兵濟江忠率數騎往石
子岡降之授開府儀同三司卒時年七十七子幼武官
至儀同三司

陳書
列傳

隋

樊子蓋字華宗廬江人也祖道則梁越州刺史父儒侯
景之亂奔齊官至仁州刺史子蓋解褐武興王行參軍
出爲慎縣令東汝北陳二郡太守員外散騎常侍封富
陽縣侯邑五百戶周武帝平齊授儀同三司治郢州刺
史高祖受禪以儀同領鄉兵平陳之後以功加上開府

改封上蔡縣伯食邑七百戶循州總管煬帝卽位徵還京師轉涼州刺史武威太守以善政聞大業三年進位金紫光祿大夫太守如故六年朝於江都宮帝謂之曰富貴不還故鄉真衣繡夜行耳敕廬江郡設三千人會賜米麥六千石使謁墳墓宴故老當時榮之還除民部尚書遼東之役徵攝左武威將軍進授左光祿大夫尚書如故九年車駕復幸遼東命子蓋爲東都留守楊元感逼王城子蓋徐設備禦至輒摧破又檢校河內南史車駕至高陽追詣行在所帝勞之曰昔高祖留蕭何於關西光武委寇恂以河內公其人也進位光祿大夫封建安侯尚書如故帝謂子蓋曰朕遣越王留守東都示

以皇枝盤石社稷大事終以委公凡可施行無勞形跡今爲公別造玉麟符以代銅獸十年進爵濟公卒贈開府儀同三司諡曰景

隋書
列傳

陳稜字長威廬江襄安人也祖碩以漁釣自給父峴少驍勇事章大寶爲帳內部曲告大寶反授譙州刺史陳滅廢於家高智慧汪文進等作亂江南廬江豪傑亦舉兵相應以峴舊將共推爲主峴欲拒之稜謂峴曰衆亂旣作拒之禍且及己不如僞從別爲後計峴然之時柱國李徹軍至當塗峴潛使稜至徹所請爲內應徹上其事拜上大將軍宣州刺史封譙郡公邑一千戶詔徹應接之徹軍未至謀洩爲其黨所殺稜僅以獲免上以其

父之故拜開府尋領鄉兵煬帝卽位授驃騎將軍大業三年拜武賁郎將後三歲與朝請大夫張鎮周發東陽兵萬餘人自義安汎海擊流求國其主歡斯渴刺兜遣兵拒戰鎮周頻擊破之稜進至低沒檀洞其小王歡斯老模率兵拒戰稜擊敗之斬老模渴刺兜率衆逆拒稜遣鎮周擊走之乘勝逐北斬渴刺兜獲其子島槌虜男女數千而歸進右光祿大夫武賁如故遼東之役以宿衛遷左光祿大夫明年帝復征遼東稜爲東萊留守楊元感作亂稜率衆擊平黎陽斬元感所署刺史元務本尋奉詔於江南營戰艦至彭城賊帥孟讓據都梁宮阻淮爲固稜潛於下流濟至江都襲讓破之以功進位光

祿大夫賜爵信安侯後帝幸江都宮俄而李子通據海陵左才相掠淮北杜伏威屯六合衆各數萬帝遣稜率宿衛兵擊之往往克捷超拜右禦衛將軍復渡清江擊宣城賊俄而帝以弒崩宇文化及引軍北上召稜守江都稜集衆縞素爲煬帝發喪備儀衛改葬於吳公臺下衰杖送喪慟感行路論者深義之後爲李子通所陷奔杜伏威伏威忌之尋見害

隋書列傳

唐

任瓌字子瑋廬州合肥人年十九試守靈谿令遷衡州司馬都督王勇盡以州務屬瓌陳亡瓌勸勇據嶺外立陳後輔之勇不從以地降隋瓌棄官去仁壽中調韓城

尉未幾罷義師起瓌至龍門請見高祖曰吾此舉其濟乎瓌曰今主政殘酷兵役不止天下之人思見拯亂與之息肩公天付神武杖順而起軍令嚴明所下城邑無秋毫之犯關中起兵者跂踵而待擁義師迎衆欲何不濟哉瓌在馮翊久悉其人情願爲一介使入關宣布威靈以收左輔繇梁山濟河直趨韓城逼邵陽徇朝邑蕭造文吏勢當自下次招諸賊然後鼓行而前據永豐積粟雖未得京師關中固已定矣高祖曰是吾心也乃授銀青光祿大夫遣陳演壽史大奈步騎六千趨梁山以瓌及薛獻爲招慰大使旣而賊孫華白元度等果降且具舟于河以濟師瓌行說下韓城與諸將進擊飲馬泉

破之拜左光祿大夫留戍永豐倉高祖卽位授穀州刺史王世充數攻新安瓌拒破之以功封管國公秦王東討爲河南安撫大使會徐元朗陷楚邱將圍虞城瓌遣崔樞張公謹守之元朗攻虞城不能拔賊平遷徐州總管仍爲大使輔公祐反詔以兵自揚子津濟江討之公祐平拜邗州都督遷陝州瓌弟璨爲隱太子典膳監太子廢璨得罪瓌亦左授通州都督貞觀四年卒

唐書列傳

五代

楊行密字化源合肥人爲人長大有力能手舉百斤乾符中以爲盜見獲刺史鄭棨奇其貌釋之應募爲州兵戍朔方遷隊長歲滿戍還而軍吏惡之復使出戍行密

過軍吏舍斬其首而出因起兵爲亂自號入營都知兵馬使據廬州中和三年卽拜行密廬州刺史淮南節度使高駢爲畢師鐸所攻駢表行密行軍司馬行密率兵赴之行至天長師鐸已囚駢召宣州秦彥入揚州行密不得入屯於蜀岡師鐸率衆數萬出擊行密行密陽敗奔營走師鐸兵饑乘勝爭入營取軍實行密反兵擊之師鐸大敗單騎走入城遂殺高駢行密聞駢死縞素向城哭三日攻其四門彥反師鐸奔東塘行密遂入揚州是時城中倉廩空虛民相食行密不能守已而孫儒殺秦彥畢師鐸并其兵以攻行密行密乃走廬州秦彥之入廣陵也召池州刺史趙鏗委以宣州行密引兵攻鏗

大敗之進圍宣州鏗弃城走追殺之遂入宣州龍紀元年拜行密宣州觀察使行密遣田頔等攻浙西取蘇常潤州二年取滁和州景福元年取楚州孫儒驅衆渡江號五十萬以攻行密行密悉兵擊之儒敗被擒行密復入揚州唐拜行密淮南節度使乾甯二年加檢校太傅同中書門下平章事行密分遣頔等攻掠自淮以南江以東諸州皆下之進攻蘇州擒其刺史成及五年錢鏐攻蘇州蘇州復入於越天復元年遣李神福攻越戰臨安大敗之擒其將顧全武以歸二年馮宏鐸叛襲宣州及田頔戰於曷山宏鐸敗將入於海行密自至東塘邀之使人謂宏鐸曰勝敗用兵常事一戰之衄何苦自弃

於海島吾府雖小猶足容君宏鐸感泣行密從十餘騎馳入其軍以宏鐸歸爲節度副使是歲唐昭宗在岐拜行密東面諸道行營都統檢校太師中書令封吳王天祐二年卒年五十四諡曰武忠子渥立五代史吳世家駱知祥合肥人也雅能治金穀遇事輒辦初事田頵爲宣州長史太祖旣殺頵以知祥爲淮南支計官勵精爲理事無留滯天祐中徐溫秉國知祥與嚴可求左右協力可求任軍旅知祥司財賦一時稱之已而初置選舉命知祥董其事任用得人世多服其精覈久之授鹽鐵判官武義元年高祖卽吳王位遷中書侍郎後數年以

疾卒十國春秋吳列傳

陶雅合肥人生故與太祖同邑太祖用爲將討定舒州盜吳迴李本等命雅攝舒州刺史未幾爲許勅所襲奔還廬州已而擊趙乾之於九華破之授池州置制使改團練使雅治池州有惠政寬厚得民景福初田頵攻歙州久不下歙人相與持城下曰得陶雅爲刺史請聽命太祖卽命雅爲歙州刺史歙人納之雅盡禮見故刺史裴樞送之還朝久之加檢校司空潯陽公高祖時遷觀察使會李遇與徐溫不相能誅死雅懼與劉威詣詣廣陵布腹心溫慰藉良厚俾還歙州累加都團練使雅治歙凡二十年卒雅鎮靜寡言善用兵天祐中充西南招討使援陳詢於睦州一夕軍中夜驚士卒多逾壘亡去

裨將韓球奔告之雅安臥不動須臾自定亡者皆還無
何大敗浙兵鹵王球錢鎰歸世咸服其有應變之略

春秋吳
列傳

袁襲廬江人太祖爲廬江刺史襲仗策從軍料事多中
畢師鐸之攻廣陵也呂用之詐爲高駢牒署太祖行軍
司馬徵兵入援襲說太祖曰高公昏惑用之姦邪師鐸
悖逆凶德參會而求兵於我此天以淮南授明公也太
祖遂率廬州兵赴之會師鐸殺高駢太祖入據揚州孫
儒之亂復熾襲曰吾以新集之衆守孤城而諸將多高
氏舊人非有厚恩素信力制而心服之也今儒兵方盛
所攻必克正諸將持彼此因強弱擇嚮背之時也海陵

續修廬州府志

卷四十六

武功傳一

十

鎮使高霸駢之舊將此必不爲吾用者因勸太祖以軍
令召霸霸卽率所部兵來太祖倉卒伏甲誅霸得其兵
數千明年儒攻揚州克其外郭太祖倉皇出走將奔海
陵襲曰海陵難守而廬州吾舊治也城廩完實可爲後
圖太祖乃走廬州久之未知所向問襲曰吾欲卷甲倍
道西取洪州可乎襲曰鍾傳定江西已久兵強食足勢
未可圖趙錞新得宣州怙亂暴殘衆心不服附公宜卑
辭厚幣說和州孫端上元張雄從采石濟師侵其境彼
必來逆戰公自銅官渡江會之取錞必矣太祖用其言
遂禽錞入宣州朱全忠與錞有舊遣使來求錞襲曰不
如斬首遺之以杜後患錞由是被殺未幾襲卒太祖哭

之曰天不欲成吾大功邪何爲折吾股肱也吾好寬而襲每勸吾以殺此其所以不壽與

十國春秋吳列傳

戴友規廬州人居太祖幕中爲賓客太祖鎮宣州時與孫儒戰失利欲退走召諸將畫策友規曰儒來氣銳而兵多蓋其鋒不可當而可以挫其衆不可敵而可久以敵之若避而走是就禽也淮南士民從公渡江及白儒軍來降者甚衆公宜遣將先護送歸淮南使復生業儒軍聞淮南安堵皆有思歸之心人心旣搖安得不敗太祖從其計遂大敗儒兵

十國春秋吳列傳

劉威頓縣人仕太祖爲牙將武進之役與安仁義等破

劉建鋒有顯功已而孫儒屢勝太祖太祖欲退守銅官

威言賊倍道遠來背城堅柵可以不戰疲之太祖以爲然久之儒兵飢且大疫儒遂爲所禽未幾授廬州刺史已又遷觀察使是時四郊多壘井邑蕭然威內撫百姓外禦寇兵廬州以甯擢鎮南軍節度使撫州危全諷帥兵十萬來攻洪州時守兵裁千人將吏聞之多失色威密遣使告急於廣陵而日召僚佐奏樂宴飲神氣閒暇旁若無人全諷懷疑不敢進及周本將兵救高安全諷被執而洪州獲全實威之力也天祐九年徐溫旣族李遇常內忌威欲興師致討威用幕客黃訥言與陶雅輕舟詣廣陵以明無二心溫相待如事太祖禮優加官爵隨遣還鎮居數年卒子崇景官袁州刺史

十國春秋吳列傳

臺濛字頂雲合肥人或言前趙特進臺彥舉之後也初從太祖起廬州下廣陵驍勇善戰積功至泗州防禦使龍紀初董昌作亂唐命鎮海節度使錢鏐討之昌求救於太祖太祖遣濛攻蘇州以牽其師久之遷漣水制置使會田頔變作太祖檄李神福白鄂州東下別遣濛將兵應之頔聞濛至自將步騎逆戰覘者言濛兵營寨編小裁可容二千人頔易之不復徵外兵濛入頔境番陳而進營壘俱按規度軍中或笑其怯濛曰頔宿將未易忽也不可不備居無何與頔遇於廣德濛以頔麾下皆太祖故時部曲可以計取陽出太祖書徧賜頔將頔將果下馬拜受濛乘其挫伏縱兵擊之頔兵遂敗走已又

戰於黃池濛先爲三覆以待兵交濛僞走頔以爲實怯追之伏發大敗倉卒還宣州城守濛隨引兵圍之頔率敢死士數百出戰濛復陽退示弱頔兵踰濛而鬪濛亟擊之頔奔回橋陷馬躡濛就斬頔頔衆大潰遂克宣州以功表授檢校太保宣州觀察使天祐元年八月卒於

官

十國春秋
吳列傳

李友合肥人太祖起淮南友隸戲下有膽勇善撫士卒大順元年將兵二萬屯青城略地常州已進拔蘇州走浙將沈粲爭先排陳勇冠一軍遷尚書蘇州刺史無何孫儒陷蘇州友見殺贈太保

十國春秋
吳列傳

王綰合肥人仕太祖爲漣水防遏使遷海州副使天復

中青州王師範以沂密叛來乞師太祖遣臺濛及綰將兵援之已拔密州將進攻沂州謀者偵城中盡偃旗息鼓綰謂此不可擊也諸將堅欲攻之綰不能止乃設伏林間以待頃之攻沂者果不克敵兵乘勢追之綰伏發得以濟師其用兵多此類武義元年加鎮東大將軍遷百勝軍節度使卒弟輿初從周本攻危全諷臨戰本視賊水柵部分諸將指旁山頭一小營謂輿曰爾往爲我取彼輿唯唯不卽往本曰爾憚往耶輿曰公必不以輿爲不武請得此柵攻之舍而趣彼何爲本大喜曰爾亦知此爲必爭之地耶乃命之輿乘輕舟襲破其前鋒遂排柵入諸軍繼進賊大潰積功遷至諸軍都虞侯睿帝

時出爲光州刺史進控鶴都虞侯左宣威統軍歷鎮海節度留後金吾衛大將軍南唐禪代輿從睿帝至潤州移鎮鄂州雅與監軍甄廷堅不相得會廷堅被誣告有二志南唐先主遣使械廷堅屬吏未至輿刺知之密告廷堅曰今可卽日歸闕待罪毋與中使遇廷堅從其計獲免由是人推其長者中主時加同平章事保大二年

卒年七十四

十國春秋
吳列傳

王崇文字光福吳功臣綰之子性重厚儒雅博綜經史少爲軍校小心敏幹尚烈祖妹廣德公主出爲歙吉二州刺史吉州民多爭訟古稱難治崇文奉法循理無所侵撓吏民便之遷虔州節度使初平建州崇文鎮之卽

日安輯民忘其亂三十年間出領藩鎮入掌禁兵官至使相常褒衣博帶與士大夫譚宴風度夷曠時人親重之福州之役迫於君命雖爲大將然上則陳覺輩專恣下則王建封劉從效跋扈崇文不能制及師潰元宗歸罪於陳覺馮延魯而崇文及諸將皆弗問頃之移鎮廬州入爲神武侍御統軍隨出夏口其治皆如初後主卽位崇文手疏時宜政體備陳箴誨加中書令未拜而卒

馬令南唐書

王安廬州人少投吳武王爲親兵武王常升高冢望敵安捧匱器侍側左右皆注目前視陣旁有執槩者疾走徑趣王所左右驚惕失措安置匱器於地取弓射之一

續修廬州府志

卷四十六

武功傳一

十四

發而殪徐內弓破中復捧器如初顏色不變武王奇之曰汝有器度當富貴因加獎拔累遷袁州刺史歷典數郡皆以沈默寬厚爲理事烈祖爲神武統軍代李章爲虔州節度使卒年七十三

馬令南唐書

王稔廬州人也中和三年太祖爲廬州刺史聞州人王勗賢召欲用之固辭問其子弟曰子潛好學慎密可任以事弟子稔有氣節可爲將太祖因召潛置門下而以稔爲騎將後積功累官滁州刺史順義三年有言鍾秦章在壽州侵市官馬者睿帝命稔巡霍邛代秦章爲壽州圍練使俄遷節度使未幾自壽州罷歸揚都爲統軍是年拜同平章事

十國春秋吳列傳

鍾泰章合肥人爲人勇敢有膽略烈祖時官左監門衛將軍高祖初襲位徐溫與張顥爭權欲刺顥而難於其人嚴可求語溫曰非鍾左衛不可溫乃使親將密論泰章泰章私心喜選壯士三十輩椎牛享之夜刺血相飲爲誓溫猶疑其怯夜半止之曰僕母老懼事不成徐圖之如何泰章勃然曰言已出口豈可已之明日遂誅顥未幾論誅叛功泰章賞獨薄或言泰章缺望溫曰是吾過也稍擢爲滁州刺史已而隨周本圍蘇州本敗於黃天蕩泰章將精兵三百爲殿多樹旗幟蔣中追兵不敢逼而還久之遷壽州團練使順義中人有告其侵市官馬者知誥以王命遣王稔代之改泰章饒州刺史溫

召至金陵使陳彥謙三詰之皆不對或謂泰章何不自辨泰章曰吾在揚州十萬軍中號稱壯士壽州去淮數里步騎不下五千苟有它志豈王稔單騎所能代乎我義不負國雖黜爲縣令亦行況刺史乎何爲自辨以彰朝廷之失時知誥欲以法繩諸將請收泰章治罪溫不可乃命以泰章次女配知誥長子是南唐光穆皇后十國春秋吳列傳

李章廬江人從吳武王爲騎將與朱瑾相悅瑾殺徐知訓自剄義祖入誅瑾黨章與同事六人當斬五人已斬次至章厲聲曰四郊多壘而斬壯士耶時馬仁裕監斬壯其言聞於烈祖釋之已隸洪州爲軍校累遷雄武軍

都虞侯左街使章雖老而心尚壯善撫士卒勤於職務
出爲百勝軍節度使爲理嚴重禁戢左右賓禮僚屬會

周本卒移鎮廬州加中書令卒年九十

馬令南唐書

田頽字德臣廬州合肥人粗通書傳沈果有大志與太祖生同里約爲兄弟應州募屯邊稍稍選軍將太祖據廬州頽從之謀略爲多攻趙鏗於宣州鏗出東溪乘暴流以逸阻水解甲謂追騎不能及頽乘輕船追之鏗驚遽見禽太祖表頽爲馬步軍都虞侯孫儒略地南來頽屯丹陽儒火揚州壁廣德頽破其屯與戰頽走太祖怒奪其兵或諫太祖曰強敵傳壘不用頽非計也太祖乃復將頽卒禽儒表頽爲宣州留後已而授頽甯國軍節

度使累遷檢校太保中書門下平章事頽已平馮宏鐸至揚州謝太祖左右求貲不已頽怒又求池歙爲巡屬不許頽始怨將還指府門曰吾不復入此是時兩浙將徐縮叛越王錢鏐入杭州逐縮縮屯靈隱山迎頽頽攻城急鏐於是遣其子傳鏐求昏於太祖且告之曰頽得志爲患必大請以子爲質願召還頽太祖使人謂頽曰不還我遣人代守宣州頽不從浙人輸錢二百萬緡犒軍又請以王子元瓘出質頽乃與縮引兵還然內怨太祖遣使通好於梁王朱全忠全忠喜屯宿州須變天復三年頽與安仁義同舉兵反攻昇州太祖得檄趣臺濛曰人常告頽必反我不忍負人頽果負我吾思爲將者

非公莫可濛頓首謝率騎渡江一戰於廣德再戰於黃池三戰於宣州城下橋陷頽爲濛所殺年四十六頽居恆畜死士數百人號曰爪牙都所向無前得其死力又善爲治通利商賈民愛之尤善遇士以是杜荀鶴等多爲之用

十國春秋
吳列傳

朱延壽舒城人事太祖破秦彥畢師鐸趙鏗孫儒功居多壽州刺史高彥溫舉州降于汴太祖襲之諸將憚城堅不可拔延壽一鼓而拔其城卽表爲淮南節度副使汴兵猶屯壽春延壽以新軍出每旗五位爲列命黑雲都隊長李厚將十旗擊西偏不勝將斬之已又益五旗殊死戰汴兵引去於是取黃蘄光三州以功遷壽州團

續修廬州府志

卷四十六

武功傳一

七

練使唐昭宗在鳳翔詔延壽圍蔡以分汴人之勢擢奉國軍節度使汴兵每至延壽境延壽開門不設備而不敢逼延壽用法嚴常以寡鬪衆不勝反者必盡戮之一日與汴人戰遣二百人持大劍欲陳有一人應留者請行延壽以違命立斬焉田頽之叛遣使詣延壽布腹心延壽陰約曰公有所爲我願執鞭頽與安仁義及延壽謀絕太祖太祖心疑之召延壽至刺殺之

十國春秋
吳列傳

王景仁廬州合肥人也初名茂章少從楊行密起淮南爲將驍勇剛悍質略無威儀臨敵務以身先士卒行密壯之梁太祖遣子友甯攻王師範於青州師範乞兵行密遣景仁以步騎七千救師範師範以兵背城爲兩柵

友甯夜擊其一柵柵中告急趣景仁出戰景仁按兵不
動友甯已破一柵連戰不已遲明景仁度友甯兵已困
乃出戰大敗之遂斬友甯是時梁太祖方攻鄆聞友甯
死以兵二十萬倍道而至景仁閉壘示怯伺梁兵怠毀
柵而出驅馳疾戰戰酣退坐召諸將飲酒已而復戰太
祖登高望見之得青州降人問飲酒者爲誰曰王茂章
也太祖歎曰使吾得此人爲將天下不足平矣後行密
死子渥自宣州入立以景仁代守宣州渥已立反求宣
州故時物景仁惜不與渥怒以兵攻之景仁奔於錢鏐
鏐表景仁領宣州節度使梁太祖素識景仁乃遣人召
之景仁聞道歸梁仍以爲甯國軍節度使加同中書門

下平章事久之未有以用使參宰相班奉朝請而已開
平四年以爲北面招討使將韓勅李思安等伐趙及晉
人戰大敗於柏鄉景仁歸訴於太祖太祖曰吾亦知之
蓋韓勅李思安輕汝爲客而不受節度爾末帝立以景
仁爲淮南招討使使攻廬壽軍過獨山山有楊行密祠
景仁再拜號泣而去戰於霍山梁兵敗走景仁殿而力
戰以故梁兵不甚敗景仁歸京師病疽卒贈太尉

五代史梁

臣傳

宋

劉虎字伯林廬州梁縣人父以上五世同居孝友雍穆
虎起農家隸軍籍四明趙善湘來帥淮西一見偉之留

帳下嘉定十五年援安豐戰賈雞山陳村漕口斬首六百級獲二統軍千戶十三人寶慶二年賊紅衲襖擾山陽以偏師敗之三年戰盱楚漣海間大小捷三十有七於劉伶臺手射貫銀甲胄者應絃而仆寶沒拐曳統軍云紹定四年復鹽城淮安敗金將於盱眙攻泗州捷無虛日擢鎮江副都統制措置邊面仍總轄淮陰水陸軍馬時元兵水陸並進虎師於五河率勇士乘風縱火焚之北兵敗績會划車弩發中矢洞腹達背悶絕復甦指授諸將方略意氣彌厲擒阿朮魯等十將三年援壽春自三月至五月晝燿兵夜斫營戰百餘合焚其壁壘解圍奏凱理宗命賜金帶金綫袍進利州觀察使明年召

除帶御器械拜合肥郡侯寶祐元年知泰州繕城浚隍恆若敵至中箭毒發請歸卒兄海從弟師勇師雄師賢皆爲名將

康熙志